

Greiffenberg, Catharina Regina von: Der ich die Warheit bin / dazu der Weg'und

- 1 Der ich die Warheit bin / dazu der Weg'und Leben /
- 2 zu und im Paradeiß / ich sage gnädigst dir:
- 3 daß / ob du mich und dich schon hangen siehst allhier /
- 4 du in demselben doch / sampt mir / heut noch solst schweben.
- 5 Der / der es selber ist / kan ja das Leben geben!
- 6 kein Gott-noch Lebens-Krafft spürstu zwar jetzt an mir:
- 7 denn / als ein Würmlein / ich erwirb die Himmels-Zier;
- 8 mein tieffste Nidrigkeit kan Himmel-an erheben.
- 9 Wer Gottes Kind / und mir ein treuer Knecht / will seyn /
- 10 der muß mein Creutz nit nur bloß lieben / sondern tragen /
- 11 und durch den Bach am Weg zum Himmel gehen ein.
- 12 An denen hab ich nur mein Lust und wolbehagen /
- 13 die mir / wie du / am Creutz / auch wider allen Schein /
- 14 vertrauen. Daß du würdest erlöß't / ließ ich mich schlagen.

(Textopus: Der ich die Warheit bin / dazu der Weg'und Leben /. Abgerufen am 23.01.2026 von <https://www.textopus.de>)